

欽定剿平粵匪方略

欽定勦平粵匪方略卷八十七 甲寅年

三月二十二日

辛酉

台灣奏言查孝感一帶賊勢

狡猾竄入縣城佈克慎督兵由楊店抄出白沙  
鋪堵截三月初九日有賊三四千人暗趨西面  
抄出陡岡鋪徑撲雲夢縣城遊擊吳定鼐等卽  
帶兵回擊賊已攻陷城池而水路之賊不下千  
餘亦由長江埠一帶乘虛抄襲其後兵勇力不

能支因而敗潰該遊擊等退抵德安府城南關  
駐紮收集潰散兵勇臣卽日差弁往白沙鋪飛  
調佈克慎所帶之兵趕來迎勦初十日佈克慎  
等先抵東關兵丁徒步較遲尙未到齊卽據探  
報賊匪約五六千由雲夢分三路來距城數里  
自雲到德之兵均已散去臣督佈克慎等直赴  
南關列陣初定賊已蟻聚蠶屯四圍擁撲分股

由西關抄往北門竄入城內縱火吶喊弁兵無  
心戀戰查點兵勇除傷亡外潰散亦十居六七  
臣惟有退扼武勝關先行收集潰兵再圖整頓  
進取乃十四日道出應山縣境適有另股賊匪  
由該縣王家店地方竄入縣城現擬將前調之  
提標官兵五百名並在關之河南防兵五百名  
一併交佈克慎統帶力圖遏賊北竄卽由應山

而德安次第規復城池飛咨河南撫臣英桂就  
近派撥精兵一二千名來楚會剿臣調度乖方  
咎無可逭應請

旨將臣從重治罪此次德安府及雲應等縣先後失守  
兵勇將弁聞風潰散此等惡習實屬誅不勝誅  
臣受

恩深重百死不足塞責現在會督署提臣佈克慎統率

官兵卽由武勝關取道應山德安設法力圖克復以報涓埃

同日英桂奏言查豫省南汝光等府州屬界連

楚北黃州德安各要隘防堵尤爲喫重

臣

先飭

南汝光道余炳燾督率防兵一千五百名在信

陽之武勝黃土平靖等關嚴密守禦羅山縣屬

之九里大勝等關派汝甯府知府廖甡等管帶

兵勇八百名分駐扼守鎮臣柏山駐兵固始兼顧光州本省應防要隘尙覺處處有備惟現據探稱三月初三日賊陷孝感隨撲雲夢初十日由雲夢進撲德安府城業已失陷十四日竄及應山准湖廣督臣台湧咨調豫省派防武勝關官兵五百名並調精兵一二千名會合督勦楚省逆氛猖獗應山逼近信陽台湧飭調武勝關

防兵自不能不速令前往臣飛咨柏山迅卽選帶兵勇馳往信陽相機堵剿以遏賊衝仍令體察情形酌留官兵駐防固始並派撫標兵五百名練勇三百名交臬司林揚祖統帶卽日馳赴歸德兼防陳州綜籌歸陳應防之處甚多兵力仍不敷分撥相應請

旨速飭西安將軍舒倫保移緩就急統帶官兵來豫徑



赴歸陳與蒙亳交界處所擇要防守其黃河各渡口現有太常寺卿王履謙河督長蘅梭織巡防與臣互相知照不敢稍有疏虞均奏入

上命軍機大臣傳諭台湧曰台湧自上年十二月馳抵德安接辦防堵迄今數月自應先事豫籌妥爲布置前此克復黃陂正望其督兵進剿何以所帶兵勇遇賊卽潰以致德安雲夢孝感應山等處相繼失守僅

欲以一死塞責於事何益逆匪竄入德安其勢甚張  
此時總以扼守要隘杜其北竄爲第一要著該督現  
駐武勝關該處與豫省毗連務卽督飭佈克慎帶兵  
實力堵禦勿令逆匪闖入一俟兵力稍集卽可力圖  
克復該督統轄全省仍當熟計兼籌以冀保全大局  
豈可專恃血氣鹵莽債事此次潰散兵勇著查訊明  
確卽行正法德安等府縣文武下落並著查明具奏

又命軍機大臣傳諭英桂曰湖北賊匪連陷雲夢德安等處勢甚猖獗台湧已督帶官兵繞至武勝關遏賊竄路該處爲由楚入豫扼要之區果得精兵鎮守逆匪自難竄越已諭舒倫保統兵由信陽州一帶直抵武勝關與台湧會合攻勦著英桂速卽挑選精兵二千名派委得力員弁星夜馳往聽候台湧調遣總兵柏山已經派赴武勝關著卽飛催前進不得稍有

遲誤德安等處與豫省交界處所路徑紛歧仍著隨地嚴密防堵毋任賊匪繞越

上又命軍機大臣傳諭舒倫保曰賊匪竄撲德安雲夢等處相繼失守武勝關爲楚豫交界要隘且由德安至信陽一帶路徑紛歧必須扼要嚴守著舒倫保迅速督飭原帶官兵馳赴武勝關與台湧聯絡聲勢防勦兼施總以堵賊北竄爲要萬不可令逆匪闌入豫

境致滋蔓延

上又命軍機大臣傳諭扎拉芬曰舒倫保已令帶兵速赴武勝關潼關一帶空虛著扎拉芬卽督兵前往駐紮籌辦防堵其毗連湖北之商雒等處仍著與王慶雲隨時咨商辦理毋稍疏虞

上諭內閣曰台湧自上年馳抵德安接辦防堵屢有斬獲特授爲湖廣總督辦理勦賊事宜應如何盡心籌

畫以副委任乃本日據奏德安等處先後失守實屬  
調度乖方罪無可辭台湧著暫行革職仍留湖廣總  
督之任帶罪自效

二十四日 癸亥 和春福濟奏言 臣等奉到

諭旨令卽撥兵交秦定三帶往徐州自應欽遵辦理惟  
軍情變幻旦夕不同現查徐州並無賊匪前此  
北竄未能渡黃之賊已由正陽回竄六安現探

由六安盡返廬州賊旣歸併一處正宜聚而殲  
旃若以得力之員置諸形勢稍緩之地轉恐有  
誤事機但賊情詭譎難保其不去而復來參將  
劉玉豹帶兵千餘名雖足堵禦而籌防必應周  
密查有已革總兵郝光甲人甚勇敢已飭管帶  
陝甘官兵一千五百名前赴正陽關協同劉玉  
豹認真防勦務使西北一帶壽州霍邱等處逆

匪不能竄擾並相機進剿六安以分賊勢現值  
急圖克復城池之際全玉貴受傷未愈合無仰  
懇

天恩俯准仍留秦定三在廬助剿以期得力

和春福濟又奏言查逆匪因我軍在北門外偪  
近大橋堵住城內出路三月十四日雨夜在對  
河橋邊偷築營壘三座意欲隔河攻我營盤使



我軍不能紮駐我兵因值雨夜未便進攻十五  
日早天氣稍霽臣和春派兵前往攻擊並知會  
臣福濟吉順督率官兵如東南門賊匪出巢卽  
分投迎勦臣和春隨卽帶領滿漢官兵馳赴北  
門秦定三已先督帶兵勇在前攻擊當令鄭魁  
士程智泉等帶湖南兵勇廣勇搶過對河由賊  
營後路抄擊派協領玉崑等督兵在橋頭併力

轟打該逆在營內以槍礮回擊並連開大礮頃  
刻間北門又突出賊匪二三千人來撲卽令兵  
勇迎勦立斃賊匪多名鏖戰甚久賊漸不支適  
西路副都統常清帶領青州營滿兵前赴店埠  
紮營堵禦路過北門常清卽飭協領多廉帶兵  
一齊上前連開擡礮各兵勇爭先力戰賊匪紛  
紛倒地我軍乘勢擁入賊營盡力砍殺屍橫徧

野將賊營三座同時焚燒我軍趕至城下併力  
攻打聞東南門礮聲甚緊臣和春卽督率官兵  
趕至見逆匪由東南兩門分股出巢經吉順等  
帶領官兵分途進剿當令鄭魁士等督兵轟擊  
逆匪愈來愈多攻打兩時之久該逆在河邊死  
拒不退我軍連開大礮轟斃多名餘賊始奔敗  
入城此戰計斃賊匪一千餘名生擒十七名陣

斬首級一百餘顆奪獲大礮六尊槍礮刀矛等件無數臣等現仍督率兵勇再行設法進剿奏  
入

上諭曰現在廬州固應及早克復爲是但北路門戶已開任賊來去汝二人惟知緊攻廬州並不兼顧北竄由正陽回六安之賊並非窮蹙奔回設該逆由西路繞出非仍循蕭碭卽旁竄河南汝等又不能分身雖

立正典刑於全局何濟琬雖逆聚廬州正是詭謀不測避實擊虛到處牽掣汝等反謂可聚而殲旃踞廬州之逆閱數月尙未克復今添賊反有把握其誰信之郝光甲朕慮其巧猾汝等何昧於事機昏憤若是耶

上命軍機大臣傳諭和春福濟曰該提督等圍攻廬州固不可緩而西路空虛必須得力大員帶兵扼要防

勦以杜賊匪續行北竄現在廬州不能迅克徒使大  
兵爲賊牽掣實屬昧於事機郝光甲前在山西追賊  
遲延迨催赴直隸軍營又復觀望不前其居心巧猾  
殊不足恃霍邱土匪情形前次寄諭已經詳示正陽  
關爲賊匪自西竄北必經之路該提督等乃稱爲形  
勢稍緩派令不能得力之員前往防勦何不知緩急  
若此著和春福濟仍遵前旨卽將所派官兵交秦定

三管帶剋日馳赴正陽關督同劉玉豹認真防剿其  
霍邱等處均責成秦定三嚴遏賊匪北竄並相機進  
攻六安與和春等聲勢亦可聯絡郝光甲仍行撤回  
廬州軍營隨同打仗其應否仍用陝甘官兵之處亦  
著妥速籌撥現在賊匪雖盡返廬州六安亦必有賊  
黨占踞且旣由正陽關回竄難保其不去而復來設  
正陽霍邱一帶防剿委任非人致令賊匪復乘間北

竄則東豫兩省處處喫重該提督等豈可一誤再誤耶

同日

上諭內閣曰順天府府尹楊需著馳驛前往河南協同英桂辦理防剿事宜

二十五日甲子勝保奏言賊自攻陷州城無日不

思北竄十九日於西面偷搭浮橋意將乘夜西竄復折而北經兵勇放火焚燒轟斃賊匪數十



名餘匪敗退入巢二十一日該逆復於西南面搭橋一座兵勇馳往施放槍礮立將浮橋焚燬連夜賊又東西撲擾奪路而出皆被擊退官兵晝夜未嘗休息俟桂明及穆輅雙禧原帶官兵到齊臣當督率各路官兵極力攻克痛加勦洗如日內兵未到齊或有竄逸自當就現在之兵盡力截擊以遏賊氛

勝保又奏言竊思賊匪守則難攻竄則易制無  
如各營官兵僅敷夜間護守營盤及遏截北路  
之用至派兵設伏實難分撥臣再四籌度酌撥  
黑龍江蒙古馬隊二百名派總管平海侍衛榮  
全協領巴依胡朗帶領前往西北之范家場渡  
河至溫涼社地方扼要嚴防日閒於西南面佯  
不設備以示無兵誘令竄至賊果於二更以後

大股擁至意欲渡河潛竄我兵遙聞聲息寂然  
不動俟其行近衝出截殺該逆猝不及防亡命  
回奔賊隊大亂我兵追殺斃賊四五百名該逆  
黑夜之中彼此自相踐踏及情急投河者不計  
其數臣與善祿等復在西北東北兩面乘夜進  
攻東西兩關賊營約斃賊衆二三百名其撲出  
之賊又經馬隊截殺八九十名前後殲斃賊匪

擊散裏脅約計數千軍威大振暫可絕該逆西北竄逸之心臣惟有飛催續調官兵到齊並四路多發偵探趁此聲威力籌勦辦

勝保又奏言臣前奏請將桂明之兵留防劉家口實恐南賊接踵而來勾結蔓延更難收拾不得不思患豫防非敢謂此閒兵力已敷勦辦無事加增也賊供初意欲到北京其所以盤踞臨

清城外者因官軍屢挫其鋒此時雖陷州城仍不敢直趨北犯臣恨不立殄羣兇豈肯任其竄逸西北東北兩路臣與善祿儘能盡力遏截其西南面則有德勒克色楞東面則有崇恩厲恩官刻下就現在兵數設法布置遏其北竄已覺大費躊躇若再兼顧南面實屬力有未逮各路文報或云土匪附合真賊不多或云賊勢不强

易於勦滅此皆局外不知痛癢之言在他人姑  
妄言之臣身在局中何敢稍爲粉飾至屢次奏  
報臣以遏賊北竄自任其實賊若大股衝突而  
出或由東西繞越而北地廣賊多遏截亦頗不  
易所以不避艱險力任其難者惟恃一念血誠  
置利害於度外衆議紛紜未必皆能見諒臣若  
稍存諉卸之見當時遵

有移紮德州緩兵徐進則臨清早當有失逆賊更當北竄目下之計自以遏其北竄爲第一要務如欲遏其南竄不能不分西北之兵西北之兵本單再一抽撥則賊之北竄勢所必然臣之不能兼顧南面者所謂兩害相權則取其輕也若幸其南竄藉以塞責臣安敢若此奏入

上命軍機大臣傳諭勝保曰前降諭旨謂勝保幸賊南

竄原因該大臣前奏於西北一路則稱以血戰當之於回竄東南西南則稱惟有跟蹤追勦是以責令就地芟除亦仍係該大臣前此自行具奏之語且所稱東昌豐工劉家口等處應行布置之處無不一一指示並未嘗令該大臣抽撥進攻之兵分防南竄之路乃此次奏報轉稱遏其北竄已覺大費躊躇直似北路尙無把握南竄更不待言顯係有心剖辨試思逆



匪若竟由南竄紆折西向何處不可繞越北犯該大臣之意以爲沿途截殺較之頓兵相持易於得力此亦實在情形屢次奏報無不以此爲長策然自獨流賊竄之後一到阜城又復負嵎抗拒該大臣所自信者尙不能收效於前朕豈能不爲顧慮至牽涉前此諭令進駐德州之旨尤屬非是若使當時逆匪竟由大路北竄繞出臨清則德州正當其衝該大臣進兵

清河不又轉在賊南乎況緩兵徐進之語豈亦諭旨  
中所有緩急機宜原在統兵大臣隨時斟酌朕亦未  
嘗因該大臣不駐德州責其違旨曉曉置辨於事何  
濟至所稱局外疑謗豈得盡無朕此時但以勦賊爲  
重該大臣果能迅殄妖氛卽有性情偏僻之處朕亦  
不遽加以譴責總在該大臣平心自問有則改之無  
則加勉自能閒執譏口若事事負氣不能深籌熟計

致逆匪日久稽誅國法具在不待他人之叅奏也桂  
明已抵館陶穆輅雙禧之兵卽著迅速督催併力進  
剿大名一帶添派駐紮正定之大同兵五百名前往  
協防著一併歸該大臣調遣

諭內閣曰此次設伏邀截斬獲賊匪甚多勝保等務  
卽乘勝會合兜圍一面嚴扼紛竄一面迅籌攻剿收  
復城池盡殲逆黨所有殺賊出力之總管平海著賞

加副都統銜二等侍衛榮全著賞給頭等侍衛協領  
巴依胡朗著賞戴花翎

同日勝保善祿崇恩奏言臣等遵查張亮基兩  
次出隊均在臣等收隊之後其殺賊若干臣等  
目所未見不知確數連日細加訪察除所報初  
七日焚燬黑家莊殺賊二千餘名已由臣勝保  
查明實在情形據實奏參外其初九十四日兩

次進攻俱經獲勝俱有斬獲每次殺賊一二百名及百餘名不等但始雖獲勝繼皆爲賊壓下練勇亦有傷亡查張亮基所帶之勇專委湖北棗陽縣典史陳韜一人教演聽其調度聞該員臨陣尙知奮勇似有微勞但不免輕進易退致有小挫其人機警善辨性喜誇張爲張亮基所信任縱張亮基不敢有意冒功然於接仗情形

並未目擊但憑陳韜之言不加考覈遽行入奏  
實所不免且陳韜每行文出示輒以監軍自稱  
其謬妄可知至所帶練勇張亮基未交卸時已  
多解散又有陳韜帶赴省城者不知確數現存  
之勇若干未據張亮基移交現已行文催查移  
覆到日卽行咨辦其實在奮勇出力之勇目人  
等仍俟查明保奏奏入

上諭內閣曰張亮基於初九十四日兩次進攻賊壘雖  
皆獲勝每次殺賊僅一二百人練勇亦有傷亡該革  
員於軍務重情不知詳細考覈輒聽信委員誇張之  
詞率行入奏實屬罪有應得著仍遵前旨發往軍臺  
效力贖罪並著勝保等派員卽日押令起解不准藉  
病逗留湖北棗陽縣典史陳韜雖臨陣尙知奮勇而  
性喜誇張語多不實且行文出示輒以監軍自稱謬

妄已極著交部議處所有兩次接仗出力之勇目人等仍著勝保等查明具奏

同日駱秉章奏言臣思湖北與湖南唇齒相依湖北之賊氛不息湖南接壤各府縣在在可危與其坐待賊來不若出境先剿隨與前禮部侍郎臣曾國藩先後札飭胡林翼及副將塔齊布升任同知直隸州王鑫等督帶兵勇分道進剿



崇通賊匪王鑫由蒲圻前進適蒲圻新到賊衆甚多勢將南犯遂擬就近迎勦初八日行抵羊樓司地方前營遇賊失利王鑫督中營繼至率勇奮擊斃賊百餘賊已敗退正造飯閒忽賊匪蠶擁而前分路抄襲王鑫率湘勇分投抵拒鏖戰數時勢漸不支紛紛潰退折回岳州賊衆蹙蹤緊追初十日全股直撲岳州曾國藩卽飭知

州朱孫詒等率南勇六百先出迎敵頗有斬獲  
湘勇繼進互有殺傷賊衆更番抗拒湘勇疲乏  
收隊暫入岳城賊分三面急攻曾國藩調水勇  
礮船駛赴岳陽樓下開礮轟擊斃賊百餘賊勢  
稍卻各勇始得鎚城而出此初十日接仗失利  
之實在情形也曾國藩以陸勇失利水勇難期  
復振探聞賊匪水陸並進省城防兵無多情形

契重遂率水勇礮船乘風暫回長沙共圖守禦  
已於十四日抵省頃探賊舟前隊百餘號乘風  
上駛已至白魚磯距省城僅百五十里順風一  
日可到而竄岳賊匪有卽日分道竄撲省城之  
信臣現會同曾國藩鮑起豹熟籌防勦機宜存  
城官兵實止三千有餘僅敷守堞之用前調新  
甯在籍知府江忠濟選募楚勇一千二百名甫

於十二日抵省現紮營北城外江忠濟臥病在  
家臣復飛札敦促再募楚勇一千力疾督帶來  
省聽調並飛調辰州各營兵一千名令都司景  
福等分帶前來曾國藩現統帶水勇戰船分布  
省河扼賊上竄其未及到岳之湘勇各營及招  
集新潰之勇擬卽紮營南城天心閣外期於內  
外聯絡水陸交防至前委胡林翼塔齊布等進

勦湖北崇通賊匪此時賊匪復竄岳州該員等  
懸軍深入餉道堪虞臣已密札飭其酌度機宜  
全師出險升用同知直隸州王鑫平素勦匪尙  
屬得力此次恃勇輕進以致失利咎實難辭應  
請

旨革職留營帶勇效力贖罪以示懲儆奏入

上命軍機大臣傳諭駱秉章鮑起豹曾國藩曰蒲圻新

到賊衆甚多王鑫迎剿失利折回岳州該匪全股直撲郡城曾國藩遽率水勇礮船回省守禦並未於臨湘一帶設法扼截致賊舟前隊已至距省百五十里之白魚磯長沙省城防守自關緊要該撫已飛調江忠濟募勇力疾赴援復添調辰州官兵來省並與曾國藩布置內外水陸各地方聯絡聲勢當可力保省垣惟岳州爲南北要隘上則屏蔽長沙下則援應武

昌咽喉重地豈可置之不顧仍著曾國藩酌撥礮船  
設計迎截並著繞道飛飭胡林翼塔齊布斷賊後路  
一面分撥兵勇於平江益陽兩路前攻岳州使該匪  
腹背受敵則省城不至危急而胡林翼等一軍亦較  
有接應且可相機水陸兩路援應武昌曾國藩所統  
礮船原爲肅清江面今旣未能迅速下駛亦豈可株  
守長沙坐視逆賊之至而不爲南北兩省通籌大局

耶鮑起豹提督全省軍務何以並未出省勦辦賊匪  
著與駱秉章等熟籌防勦會國藩仍應統帶舟師下  
駛或分撥船勇併力攻擊俾湖南境內賊氛掃蕩庶  
可援救湖北現在黃州上竄之賊非有大隊水軍駛  
至漢陽江面無以牽綴該逆之後駱秉章會國藩當  
如何急籌奏功爲兩湖全局計也王鑫進勦失利著  
卽革職該員平素勦匪尙屬奮勉著准其留營帶勇



效力贖罪

同日

上命軍機大臣傳諭載齡曰文瑞痼疾益甚准其開缺  
固安地屬扼要載齡駐此居中調度各路官兵聲勢  
可期聯絡現文瑞旣未能前往該侍郎卽無庸移營  
他處雄縣防堵事宜亦關緊要卽著該侍郎派委得  
力員弁帶兵前往駐紮

二十七日

丙寅

僧格林沁奏言逆匪前受懲創堅

匿不出二十二日陡起大風該逆乘風由塔兒頭村擁出二三百名撲向西南營壘馬步官兵齊進擊斃賊五六十名該逆敗退二十三日豫派侍衛達崇阿帶領馬隊官兵二百名伏於前次燒燬賊巢其餘馬隊官兵在濠邊屯紮以備接應臣帶領小隊官兵數十名在縣城紅葉屯

適中之樹林內暗伏卽飭馬步各隊官兵往誘該逆並不出巢當將官兵撤回臣仍伏林內該逆在城上及樓房瞭望見我兵人數無多大隊全行撤回隨由紅葉屯撲出賊匪二百餘名達崇阿帶兵出村從中截擊斃賊數十名忽南關東南關紅葉屯塔兒頭村撲出賊匪四五千名蠶擁而至直撲南面當將達崇阿撤回同小隊

官兵一字排列該逆三面直撲見我兵屹立不動不敢前進復飭達崇阿帶兵壓下斃賊五六  
十名復將達崇阿撤回仍前排列該逆數千之  
衆見我兵二百餘名從容不迫隊伍整齊正在  
懷疑閒將軍瑞昌等帶領

盛京步隊官兵侍郎培成等帶領察哈爾馬隊官  
兵副都統那敷德帶領昭烏達密雲官兵從東

南正南西南壓下副都統烏凌阿等帶領官兵  
從東北正東壓下副都統達洪阿帶領官兵撲  
近賊隊奮勇直前斃賊不計其數該逆見官兵  
驍勇卽欲奪路逃回我兵四面兜擊該逆潰逃  
無路拌死抗拒我兵奮力攻擊復又斃賊多名  
鏖戰三時之久時已昏黑徐徐撤隊該逆受此  
大創勢必死守不出惟有再爲設法極力進攻

以期迅速戴事

同日勝保奏言臣前因設伏截賊獲勝知賊思  
竄愈急當於二十三日夜派隊直撲賊巢賊衆  
大驚殺斃無數當將林家圍賊壘登時焚燬乘  
勢掩殺復將該逆所踞校場賊壘二處放火焚  
燒該逆因東關巢穴已失不能抗拒全股逃至  
西南城廂屯聚仍於西北東南營壘抗拒揣測

賊情似已不敢北竄現在賊巢尙有十餘處城上守陴之賊亦復不少地方遼闊不能合圍東南西南正南皆無可撥之兵不得已於馬隊內抽撥三百名令其渡河分紮范家場戴家牖劉家莊三處以爲奇兵查桂明之兵現已到營似屬精悍可用穆輅雙禧之兵不知行抵何處現在軍營馬隊爲數無多擬請將穆輅所帶未到

之步隊官兵一千名撥赴阜城軍營請

飭僧格林沁於明慶烏凌阿所帶馬隊官兵酌撥一千名或八百名速來臨清大營並請

飭下吉林黑龍江續派馬隊官兵三四千名暫駐關內聽候隨時調遣均奏入

上命軍機大臣傳諭僧格林沁曰逆匪竄踞阜城堅匿不出總未大受懲創經該大臣設計誘賊出巢該逆



突出四五千名直撲南面顯係奪路奔逃欲與臨清之賊互相勾結現在大礮業已到營著該大臣卽督飭員弁趕緊進攻以期迅速蕲事勝保請將穆輅所帶之兵一千名撥赴阜城於僧格林沁軍營內明慶烏凌阿所帶馬隊官兵酌撥一千名或八百名速赴臨清聽候調遣卽著僧格林沁酌量調撥

上又命軍機大臣傳諭勝保曰逆匪竄踞臨清經勝保

等督兵攻勦屢獲勝仗惟賊巢尙有十餘處城內之賊亦復不少必當乘此聲威迅圖殄滅不可任其奔突致與阜城之賊勾結逆匪疊受懲創其勢已挫我兵於西北一路必能力遏賊衝其東南西南正南僅抽撥馬隊三百名渡河分紮尙恐不敷堵勦該大臣務卽統籌全局迅將此股逆匪就地勦除毋令蔓延又命軍機大臣傳諭景瀄麟瑞英隆清安曰阜城之

賊尙未殲除皖省逆匪又竄踞臨清經勝保等督兵  
圍剿必得多集兵力方可及早撲滅著景瀛卽將前  
項備調官兵一千名交麟瑞管帶英隆卽於前項備  
調官兵二千名內挑選一千名交清安管帶卽日起  
程由天津行走徑赴軍營聽候調撥

又命軍機大臣傳諭文謙曰阜城臨清兩股逆匪疊  
經僧格林沁勝保等攻剿獲勝當可扼其北竄惟津

郡爲畿南門戶滄州又爲天津南路藩籬皆應加意  
防範津郡所屬多與山東地面犬牙相錯其運河迤  
南一水直達若該逆勢窮思竄或由閒道北犯文謙  
當就現有兵勇擇要防堵勿令闖入滄州鄉勇數千  
著飭地方官勤加操練以濟兵力之不足青縣慶雲  
鹽山南皮等縣亦當一律辦團不得以兵勇單薄爲  
詞稍涉疏懈載齡現駐固安距津不遠儘可就近策

應著文謙多設遠探遇有警急卽行飛報巡防王大臣並知會載齡以便發兵應援

二十八日丁卯勝保奏言賊匪連日將南關糧食

搬運入城復於城外添築營壘西關外賊巢增至十餘處臣恐其又爲死守之計因將五千斤大礮二尊運上礮臺晝夜向賊巢轟擊傷斃賊匪極多並用神威礮五百斤銅礮助擊使賊不

能安身二十五日臣親帶馬隊在州城外四面  
察看地勢嚴密布置分爲三路令提督桂明總  
兵桂齡孔廣順帶領官兵由西北進攻善祿及  
雙禧所帶健銳火器營官兵由東南進攻已革  
藩司張集馨親帶練勇與侍衛恭鈺等帶領通  
永官兵及各勇由西面夾河攻擊臣親督馬步  
官兵在城北列隊以待二更後西北風微作我

兵銜枚疾走不令賊知二十六日丑刻各勇由西過河暗伏壘邊向西面一帶賊巢同拋火彈齊聲吶喊十餘處登時火起賊衆不知官兵多寡又見巢內火起登時慌亂大隊一擁而進殺聲震天賊巢之內逆黨蟻聚蠱屯尙復抵死相抗官兵愈殺愈勇賊勢不支冒火突出我兵追殺兩時之久斃賊約三千餘名直抵南面賊營

西南關廂長街十餘里賊黨甚多我兵入街賊  
卽乘隙出街向南紛竄崇恩所帶之兵乘勢躡  
躍登城立斃城上之賊數十名餘賊竄伏大兵  
克復州城兵勇分投搜殺復斃賊二三百名統  
計斬擒不下四千名裹脅之衆乘閒逃出者又  
數千名德勒克色楞善祿及克興阿魁福綿洵  
等現已帶兵追往臣一面與崇恩收復城池派



兵搜獲餘匪一面督帶馬隊極力截殺使賊不得喘息至州城復後撫恤難民彈壓土匪亦關緊要應令崇恩暫駐臨清妥爲辦理在事出力之員弁兵勇可否仰懇

天恩酌量保奏奏入

上命軍機大臣傳諭勝保曰臨清州城克復賊匪乘隙出街向南紛竄並無確實去向難保不繞越他竄臨

清西南緊接大名廣平由東南而北直抵德州距阜城之賊甚近該逆詭譎百出或精銳早已潛竄而留孱弱裹脅之衆以當我兵則雖克復州城仍非了局該大臣等務當乘勝窮追使該逆不得喘息自不至再有蔓延崇恩著卽留於臨清督辦善後事宜東昌一帶頗形空虛卽賊蹤未曾擾及亦不可稍疏防堵上又命軍機大臣傳諭僧格林沁曰臨清州城克復殲

戮雖夥首犯尙未就獲仍恐多係裹脅之衆現在賊  
已南竄更慮其詭詐百出從旁繞越北犯著僧格林  
沁迅卽確探消息嚴密防範明慶烏凌阿馬隊此時  
是否起程如賊果南竄離阜城較遠卽著此項馬隊  
趕緊馳赴臨清協同追剿儻賊有北犯之意無論大  
名及山東東昌德州一帶均著該大臣迅派馬隊迎  
頭截擊萬不可稍事耽延

衛惟是皖省全局實處萬分棘手之時南之舒  
桐懷太潛松六邑西之六安英霍蒙潁等五邑  
東之巢廬和含四邑皆爲賊匪占踞往來之區  
北路定遠壽州等處土匪又復蠶起冒充粵賊  
遙作聲援且賊有約齊巢湖匪徒攻我店埠之  
信廬州兵勇一散全皖皆爲所有我若分兵正  
中賊計臣等紮營於此實類垓心非敢頓兵堅

城之下爲株守自衛計也奏入

上命軍機大臣傳諭和春福濟曰正陽霍邱一帶門戶洞開全軍爲廬賊所牽掣儻再墮賊奸計復令伺隙北趨勢更不可收拾自應分兵嚴扼北路爲緊要關鍵並非謂廬州可不必攻亦非令秦定三帶兵株守正陽遂不進剿六安賊匪也試問該提督等克復廬郡有無一定把握若廬州不能卽復重兵爲賊牽掣

與株守之防兵何異若能於正陽霍邱一帶扼其要隘相機進攻六安舒桐等處卽可以防爲勦不但遏賊北竄且與廬州大軍聲勢聯絡輕重緩急機宜該提督等何不一加審度耶郝光甲若果足資捍衛何以不留於廬州可見不如秦定三之得力以賊匪衝突要路委任非人儻致再有疏失誰當其罪著和春福濟卽將郝光甲撤回迅速酌撥精銳官兵飭令秦

定三剋期統帶前往正陽關督同劉玉豹嚴密設防扼要堵截其六安霍邱一帶逆賊土匪均責令秦定三相機防勦和春福濟仍卽督率將士設法攻勦廬州不得藉口兵分力單徒事株守一面與秦定三袁甲三等聯絡聲威以資接應

同日曾國藩奏言臣於三月初五日在岳州舟次札飭貴東道胡林翼前平江縣知縣林源恩

前往平江防剿崇通賊匪隨又派副將塔齊布  
守備周鳳山帶勇直擣通城旋據林源恩會同  
署平江縣知縣汪敷灝暨胡林翼等先後稟報  
初二初六兩日與賊接戰疊獲勝仗前後共計  
殺斃賊匪千餘賊匪連夜狂奔由通城竄回崇  
陽又據塔齊布稟稱初五日自岳起程聞白港  
地方有賊匪沿村擄掠初七日督勇至石南橋



進剿斃賊四十餘人生擒二十二名初八日馳  
赴通城收復縣城此剿辦平通股匪疊獲勝仗  
之實在情形也至岳州一城前經撫臣札飭朱  
孫貽帶勇六百人追剿又札王鑫帶勇二千餘  
人扼防臣隨身又帶有陸勇一千六百人兵力  
本不爲單因崇通股匪過多王鑫於初六日自  
岳起程取道蒲圻前進初七日至羊樓司地方

適與賊遇前鋒少挫王鑫率勇踵至殺賊百餘  
大股賊匪分四面抄出衆勇勢難抵禦紛紛潰  
散初八日仍回岳城初十日早賊大隊卽來犯  
岳官軍衆寡不敵勢難拒禦各營以次奔潰惟  
監生鄒壽璋一營五百人毫無驚怖被賊數千  
圍在各勇併力苦戰卒得衝圍而出殺賊極多  
各勇有退回城內者賊卽乘勢圍城三面皆係

賊隊惟西面濱湖一門無賊臣當遣大小戰艦  
駛赴西門開礮環擊共斃賊百數十人賊勢稍  
卻各勇卽乘隙縋城而出此岳城陸路戰敗水  
軍小勝之實在情形也臣奉

命赴下游會勦舟次岳州原飭水陸各勇俱於岳州會  
齊俟各勇畢集誓師東下爲肅清江面之計不  
料後幫陸勇二千水師二千皆以阻風洞庭不

克依限抵岳而前幫陸勇又先遣千八百人至  
平通臣隨身止有陸勇千六百人猝遇金口大  
股賊匪數萬來犯遂至潰敗陸路旣已失利水  
軍亦無固志初七大風以後各船損壞力難應  
敵適因賊水陸大隊全數南竄湘省臣遂乘風  
上駛退保省城但冀保此船礮留爲將來殄寇  
之資則臣雖蒙恥獲罪亦不敢惜至臣奉

命會勦尚未出境卽有此挫皆由臣調度乖方所致請  
旨將臣交部治罪奏入

上命軍機大臣傳諭駱秉章曾國藩曰岳州陸軍敗潰  
水路小勝並船隻遇風損壞已將曾國藩交部嚴加  
議處曾國藩所統各勇爲數過多旣須勦辦粵逆又  
須搜捕土匪卽如所奏有撥赴平江通城者有撥赴  
臨湘蒲圻者又有不能依限前進者散布各處照料

既不能周勦捕自難得力此時肅清江面專恃此軍  
曾國藩一人誠恐不能處處照顧著卽與駱秉章妥  
爲商推有可協同帶勇之人卽著一面具奏一面飭  
令來營管帶以資攻勦四川鹽茶道夏廷樾現已留  
於湖南著卽幫同帶勇進勦駱秉章所調兵勇諒已  
陸續到省曾國藩師船總以進復岳州兼籌東路爲  
要鮑起豹本係水師大員何以不令督帶舟師勦辦

賊匪是否不能得力且該提督何以陸路亦未帶兵  
前進著駱秉章等查明具奏

上諭內閣曰此次岳州水軍雖獲小勝惟因陸路失利  
以致賊匪復行上竄曾國藩統領水陸諸軍調度無  
方實難辭咎著交部嚴加議處仍著督帶師船迅速  
進剿克復岳城卽行赴援武昌毋得再有延誤